

## BIANCA

Oltra la cavedagna del campo de formento, jera una caseta dove viveva una vecieta sola de tanto tempo. La sua pasion jera i fjori. La gaveva un giardin carigo de tuti i tipi de fjori e la li curava e la ghe voleva ben come se i fusi stadi sui fjo. In primavera quel giardin jera una meraviglia, un mar de colori e de profumi che atirava farfale, ave, uzeleti e i sguardi invidiosi dela gente che pasava de là.

In quel giardin le farfale svolava de fjor in fjor, le se coreva drio contente e le se divertiva come se le fusi al parco giochi. Se ghe ne podeva veder de tuti i tipi de colori e misure, con le ale lunghe o curte e con i colori che luziva soto la luce del sol. Tra tute queste, jera anche una picia farfalina bianca che però no pareva che la se la godi tanto come le altre. La stava in disparte, sula sarieza che gaveva i fjori del suo steso color. Le altre farfale no i la voleva con lore su quei bei fiori perché no la gaveva i colori sulle ale come tute le altre. La ga provà più volte star con lore, ma vanitose e presuntuose, le la scasava via. Ghe dispiaseva de no gaver nisuna amica farfala, ma sui rami de quel albero i siligati e le vespe ghe faseva compagnia e i la consolava: "Le ze cative con ti e per sta ragion , un giorno, le vegnarà castigade!".

No gaveva piovudo za de tanto tempo e faseva sempre più caldo. I campi torno la casa jera sempre più suti e gialii; solo l'erba del giardin jera verde e i fjori dela vecieta vivi e sani. Quela povera dona la se svejava bonora ogni matina per darghe acqua e la stesa roba la faseva al calar del sol per via che no i se brusi. Ma nianca de giorno no la stava tranquila perche la doveva mandar via le bestie e i usei che i vegniva cercar de magnar in tel giardin perché torno jera tuto suto. Ma la ghe voleva ben ai sui fjori e ghe piaseva star sentada soto la pergola in ombra a guardarli con tute quele farfale colorade che pareva le balasi sun lori.

Una matina, però, la vecieta no ze andata bagnar i fjori, e nianca la sera, né el giorno drio e nianca quel dopo. I fjori ga comincià picàr sempre più e sugarse e la erba ze diventada giala. Le farfale no le gaveva più quei bei fjori coloradi come lore, tuto ze diventa maron e smorto. Solo la sarieza sopraviveva perché la gaveva tanti ani e le radise ben interade in fondo la tera. Ga comincià vignir in giardin usei, rospi e bise: no iera più chi li mandava via e là jera tante farfale de magnar. No jera difficile vederle con quei colori che spicava su quel grigior, no le gaveva più dove scondersi come prima. Le ga provà zercar salvesa sula sarieza, ma se le vedeva anche sul sfondo bianco. I le ga magnade una dopo l'altra e quando no ghe ne jera più i se ga sposta. Ze restada solo la farfalina bianca, perché nisun la gaveva vista in mezo a quei fiori bianchi. La jera terrorisada perché la pensava che la morirà anche ela, ma jera l'unica che se ga salvà. Ela, quella che nisun voleva perché senza color!

Ala farfalina ghe dispiaseva per la sorte dele amiche, deso la jera sola e la jera cosiente che quando i petali bianchi cascarà, le bestie la la vedarà e la magnarà. La spetava disperada e senza speranze quel momento, quando el ciel ga comincià scurir e poco dopo ga comincià a piover. Pioveva che Dio la mandava, e per una intjera setimana. Tuta la natura se

ga risanà, ze tornà de novo tuto verde, con l'aria neta e col caldo più soportabile. La farfalina la ga spetà che smeti la piova soto la pergola, dopo la se ga fato un svolo per veder cosa iera suceso.

I fiori dela vecieta no i ze rinati, ma fra la erba del giardin ze nate tante picie margheritine bianche che, dopo un per de giorni, pareva che qualchedun gavesi distirà un tapedo bianco là in mezo. La farfalina jera contenta perché deso la gaveva dove star senza che le bestie la vedi. Ma la piova no ghe ga portà solo quei bei fiori bianchi. In tel giardin ze rivà anche un intiero ciapo de farfaline bianche come ela. Jera le sue sorele che la la ga sempre sercada, dopo che el vento la ga portada via prima che la se svilupi finché jera el bruto temporal. Ela no la se ricordava niente de sto fato e la ga sempre pensà de eser nata in quel giardin insieme a quele farfale colorade. Finalmente no la jera più né sola né triste perché la se vedeva diversa. Ala fine sta ultima ze stada la sua fortuna.